

太上靈寶智慧觀身經

靜觀真人於思微中觀身實相深達智慧了見四大六種根識及五聚蔭五印世法皆悉空寂入無相門所謂外想內想若生想若滅想了了照盡無淨穢法無生滅法如是盡處亦無所盡究皆是空空竟升玄何以故內想者名境觀空是空亦空空空亦空空無分別空故是無分別空亦復皆空空無二致故言其盡若善男女照法空性無起滅心無憍慢心無恐怖心無憎愛心能於世間免種種苦所謂生死別苦鬼神害苦官私口舌苦水火刀兵饑寒苦皆悉免離如是盡利益非於一人二人必於無量無邊無量數人非一天二天無量無邊無量數天其功德

道藏輯要

觀身經

全

房集六

力不可思議是故此說名爲解脫名利益義名無量義名第一義如是諸義若書若寫若讀若誦若解說是爲入智慧門遊智慧室坐智慧牀餐智慧食得智慧真相之體卽於爾時說智慧頌曰

智慧起本無	明明照十方	結空峙玄霄	諸天挹流芳
其妙難思議	虛感真實通	有有有非有	無無無不無
智慧常觀身	學道之所先	渺渺入玄津	自然錄我神
天尊常擁護	魔王衛寶言	晃晃金剛軀	超超太上仙
智慧生戒根	眞道戒爲主	三寶由是興	高仙所崇受
汎此不死舟	倏忽濟大有	當此說戒時	諸天來稽首

太一救苦護身妙經

爾時

元始天尊在玄景之上清微天中九色玉堂昇七寶座放大光明普集萬靈與天教化十方天尊道君老君帝君元君丈人聖人萬萬仙眾俱來詣座聽宣妙法於是梵王稱善帝釋欣歌仙樂自響隨光而至是時

太上老君身離玉座步躡蓮花真人侍於左右玉女扶於曳裙至

天尊前奏曰臣等蒙師開化受福天堂施功無極恩不可量臣觀三界之中苦海之內無量眾生橫遭厄難罪網牽纏異類羣

道藏輯要

護身妙經

全

房集六

情難逃生化臣不可住於太清欲仗威光分身三界救度羣情惟望至尊觀心慈愍於是

元始天尊微起法身告

老君曰善哉善哉汝離玉座驚怖萬天救苦救生不須汝言可還座中吾爲宣說

天尊曰萬物吾生萬靈吾化遭苦遭厄當須救之不須汝威力化身救度此東方長樂世界有大慈仁者太一救苦天尊化身如恆沙數物隨身應或住天宮或降人間或居地獄或攝羣邪或爲仙童玉女或爲帝君聖人或爲天尊真人或爲金剛神王或爲魔王力士或爲天師道士或爲真人老君或爲天醫功曹

或爲男子女子或爲文武官宰或爲都大元帥或爲教師禪師
或爲風師雨師神通無量功行無窮尋聲救苦應物隨機今告
汝知老君重奏曰此之威神有無量變化如何得至我師御前
天尊告老君曰汝可舉聲唱太一之名使仙官齊詠自然應化
現身於是老君眾仙等遵其教旨齊聲稱誦太一救苦天尊之
名忽見帝君班中有童子一人步步躡於蓮花稽首至
天尊前奏曰臣乃太一爲我師開化說法臣集相聚形聽宣妙
音天中快樂一時地下動經萬劫三界之中羣生受苦高聲叫
喚苦哉苦哉旋遶

天尊禮拜俯伏乞下天宮於是眾仙見童子奏對泣淚滴衣哽

道藏輯要

護身妙經

全

房集六

噫嘆言天上快樂地下受災輪迴報對何時清閑

天尊告太一曰汝行願慈悲眾生受苦依汝行願分身救之童
子喜笑再拜而退眾仙觀見童子化一天尊足躡蓮花圓光照
耀手執柳枝淨水九頭獅子左右從隨乘空而去又見

天尊化一帝君足躡蓮花手執如意圓光照耀九頭獅子左右
從隨乘空而去又見帝君化一真人足躡蓮花手放神光上通
九天下通九地九頭獅子左右從隨乘空而去又見真人化一
女子身著火錦襪衣披髮跣足躡於蓮花手執金劍圓光照耀
九頭獅子口吐火焰遶於身形乘空而去老君奏

天尊曰此聖威德變化救生從何而有甚劫修行惟願應機爲

眾宣說

天尊曰此聖在天呼爲太一福神在世呼爲大慈仁者在地獄呼爲日耀帝君在外道攝邪呼爲獅子明王在水府呼爲洞淵帝君汝是吾之氣吾是汝之根汝知吾知此是九陽之精甚靈甚靈汝可祕之不可盡述是時老君聞

天尊言閉目定神彈指叩頭咒曰

元元之祖氣 妙化九陽精 威德布十方 恍恍現其真

三九揚風出 徘徊離始青 恭敬生瓊液 奉之免渴饑

萬靈當信禮 八苦不能隨 積行持科戒 提攜證玉京

爾時

道藏輯要

護身妙經

齋

房集六

天尊重告老君及諸仙曰若有眾生時遭疾疫病痛纏綿可以焚香念誦聖號看轉此經疾患退散克獲安甯若有眾生求官覓職姦佞妄生但當念誦聖號看轉此經自然嫉妬不生高遷祿秩若有眾生泛涉江海波浪所驚魚龍欲傷可以存思念誦聖號便得達岸無有害傷若有眾生值雷霹靂風雨驚怖但當存思念誦聖號神氣爽清魂魄不動若有眾生父母師資六親不和兄弟乖疎但當存思念誦聖號看轉此經自感六親和睦父慈子孝兄友弟恭若有帝王國主朝生叛臣兵火作亂風雨不調萬民塗炭怨地尤天但當持齋念誦看轉此經風雨便得順時叛臣敗露國泰民安若有眾生爲邪精鬼賊妄來所傷但

當存思念誦聖號妖魅自止鬼賊滅亡若有眾生山林往來被
蟲蛇禽獸奔奪所傷但當存思念誦聖號禽蟲自退不敢來害
若有女人懷受胎孕臨產艱難但當存思念誦聖號自感真氣
佑護無痛無傷便生智慧之男有相之女六根具足母子團圓
若有男子女子慕道求仙在家出家養性養命但當存思念誦
聖號看轉此經便得功行圓滿白日昇天若有眾生頻遭枷鎖
牢獄之中呻吟難訴但當存思念誦聖號便得解脫出離囹圄
若有眾生爲七祖九先門人同學夫妻男女身歿之後流滯寒
庭未得託生但當存思念誦聖號自然出離陰境便得生天若
有眾生爲冤家牽引復連相纏但當存思念誦聖號冤家解釋
道藏輯要

護身妙經

全

房集六

復連斷除於是

天尊告老君曰此聖最尊最貴最聖最靈每月三九日多降人
間常於淨室中焚香禮拜柳枝淨水時花藥苗如法供養自然
壽滿一百二十五福常臻八難遠離切忌竈下灰燼石榴穢物
此爲不潔勿令觸之爾時
天尊說經畢竟大會之中羣仙唱善獅子能語鳳凰能言魚龍
成人枯朽還生蠢動含情福資皆徧巍巍堂堂皆得昇仙於是
道君老君無量眾真同聲讚嘆今聞妙音大獲利益奉辭而退